



## Grupo Provincial Socialista

Rúa Progreso, 32 – 2º andar  
32003 Ourense  
Tif. 988 317 972  
CIF: G32244345

**ÁLVARO VILA ARAUJO**, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA A POSTA EN MARCHA DUN SERVIZO PROVINCIAL DE PREVENCIÓN, SENSIBILIZACIÓN E ATENCIÓN DAS ADICCIÓNS**.

No relativo ás políticas públicas adoitan concorrer unha serie de factores que coadxuvan na entrada dun determinado problema na axenda de goberno: que este xere alarma ou ameaza, que teña impacto emocional, que afecte a un número significativo de persoas, que se activen grupos de interese organizados, o peso que poidan ter a tradición e cultura diante de nomeadas situacións, o rol dos medios de comunicación á hora de difundir casuísticas dadas ou o particular momento do ciclo político. Porén, semella que escapa a estas lóxicas o fenómeno das adiccions, tanto as relacionadas con substancias como drogas e alcohol, como as vencelladas co xogo e as novas tecnoloxías, entre outras. Resulta flagrante o exemplo das drogas porque, se ben a incidencia do seu consumo non descendeu un ápice desde a década de 1990, a súa visibilidade social actual entóxase moito menor. No entanto, na provincia de Ourense os delitos asociados á drogodependencia supoñen xa o primeiro motivo de ingreso en prisión e máis da metade dos internos do Centro Penitenciario de Pereiro de Aguiar consuman sentenzas por furtos, roubos violentos ou estafas vencelladas coa adicción ás drogas.

A Estratexia Nacional sobre Adiccions 2017-2024 incorpora tamén as adiccions comportamentais, con énfase nos xogos de apostas e as novas tecnoloxías, pero tamén ás compras, á pornografía, ao sexo, ao tabaco ou con relación a certos trastornos alimentarios. Amais da existencia dun amplo abano de adiccions, hai gran diversidade nos perfís dos adictos. Alén do estereotipo do delinciente que rouba a consecuencia do síndrome de abstinencia, a drogadicción, ao igual que outras adiccions, afecta a unha ampla gama de figuras, que poden ser traballadores por conta allea ou emprendedores, de diferentes estratos sociais, incluso acomodadas, con estruturas familiares normalizadas e funcionais, homes e mulleres, en idades maduras ou na adolescencia, galegos de berce, naturalizados ou inmigrantes. Antes destacaba o perfil do politoxicómano, principalmente heroinómano, e hoxe a maioría da poboación que padece algunha adicción é consumidora de cocaína, cannabis e alcohol, ou ten problemas coas novas tecnoloxías, o xogo e as apostas online, os dispositivos electrónicos ou o sexo e a pornografía, tal e como reflicten as estatísticas e informes do Observatorio español das drogas e as adiccions do Ministerio de Sanidade.

Dentro do Plan Nacional sobre Drogas, en 2023 Galicia recibiu do Estado máis de 575.000 euros para o desenvolvemento de políticas de prevención de drogas e atención a outras adiccions, ao que hai que engadir achegas procedentes de comisos por vía de acordos bilaterais. Sucesivos ministros de sanidade teñen posto en valor a unidade de acción entre administracións, que caracteriza a abordaxe das adiccions no Estado e garante a implementación do Plan Nacional sobre Drogas con máximo rigor e garantías. En Galicia a loita contra as adiccions enmárcase na Lei 2/1996, do 8 de maio, sobre Drogas; no Decreto 41/2008, do 28 de febreiro, polo que se establecen os criterios para a autorización dos programas e actividades de prevención en drogodependencias e se constitúe o Comité Técnico de



## Grupo Provincial Socialista

Rúa Progreso, 32 – 2º andar  
32003 Ourense  
Tif. 988 317 972  
CIF: G32244345

Prevenición de Drogodependencias da Galicia; e a Lei 13/2008, de 3 de decembro, dos servizos sociais de Galicia. A través do Servicio Galego de Saúde desenvólvense programas de prevención, sensibilización e atención das adiccións que, con fitos coma o Plan de Trastornos Aditivos de Galicia 2011-2016, complementáanse coa acción dos servizos sociais municipais e acordos con entidades do Terceiro Sector, a través de referentes coma Proxecto Home, Cruz Vermella, Fundación San Rosendo ou a Asociación As Burgas, que só en 2023 atendeu a 333 ourensáns con trastornos aditivos.

Segundo a última enquisa realizada polo Plan Nacional sobre Drogas entre unha poboación comprendida entre os 15 e os 64 anos de idade, os galegos en terapia pola súa adicción ás drogas marcaron o seu máximo en 2023, con máis de 14.800, un 28% dos cales están a ser tratados por alcoholismo, rexistrándose un importante incremento entre os adictos comportamentais. As principais cidades de Galicia contan con servizos de prevención e atención á drogopedendencia, dando conta a Federación Española de Municipios e Provincias (FEMP) de dous concellos galegos que, nalgún momento, tiveron un plan municipal de adiccións, a saber, Vigo (2011-2016) e Santiago de Compostela (2018-2021), conformándose Lugo coma o único que ten o seu en vigor (2021-2025). Sendo un dos grandes problemas que afrontan as sociedades modernas, que non só afecta ás persoas que as padecen, senón tamén ás súas familias e á sociedade no seu conxunto, a loita contra as adiccións preséntase coma un desafío de primeira orde. Este desafío é aínda máis grande para os concellos pequenos que, en virtude do limitado dos seus recursos, vense na incapacidade de atender axeitadamente ás súas veciñas e veciños vítimas de adiccións.

Por todo o exposto o Grupo Provincial Socialista presenta as seguintes **PROPOSTAS DE ACORDO**:

**PRIMEIRA.-** Instar á Deputación de Ourense a desenvolver as competencias que a lexislación lle atribúe para a posta en marcha dun servizo provincial de prevención, sensibilización e atención das adiccións que atenda aos concellos de menos de 20.000 habitantes en materia de información, orientación e asesoramento, diagnóstico e tratamento.

**SEGUNDA.-** Instar á Deputación de Ourense a estudar a mellor maneira de prestar este servizo, xa sexa a través dun sistema fixo ou itinerante, ora a través dunha prestación directa, dispoñendo os recursos materiais e humanos necesarios, ou a través de entidades do Terceiro Sector que dispensen a asistencia necesaria aos concellos que se adhiran ao programa.

En Ourense, a 15 de maio de 2024.

Asinado: **Álvaro Vila Araujo**

**SR. PRESIDENTE DA DEPUTACIÓN PROVINCIAL DE OURENSE**